



Kampkummels



Nuusblad van Streek Kiepersol van die SA Woonwa-Assosiasie

Jaargang 36, No 5 Mei 2020

15 woonwaens by Kiepersol se virtuele Korona-saamtrek



Diané Baker se kamp is klaar opgeslaan. Met haar babapop, stoetwaentjie en fiets is sy slaggereed vir die naweek

Kampeer by jou huis!

Wilanda skryf dat die derde week van die inperking haar begin "vang" het.

"Kort-kort sukkel ek met Quintin (ek soek eintlik skoor). Dis toe dat ek die *whatsapp*-boodskap van Chris en Litia Joubert lees dat dit nou tyd is om te kamp.

Die *whatsapp* lui dat die bestuur alle Kiepersollers uitdaag om (by hulle huise) 'n werklike kamp op te slaan, daar te slaap, te eet, te speel en lekker saam te kuier. Die idee vind byval om die naweek van 17 tot 19 April 2020 'n virtuele saamtrek te hou.

Hierdie briljante plan vind ook op nasionale vlak inslag en daar word oor die lengte en breedte van die land in SAWA-streke kamp opgeslaan en donasies aan die nasionale fonds gemaak.

239 Gesprekke tydens die naweek

Kiepersol het tydens die naweek saamtrek 239 keer met mekaar op *whatsapp* gesels. Boodskappe het heen en weer gevlieg om mekaar op die hoogte te hou waarmee elkeen besig was.

Hierdie inligting is verkry toe die boodskappe op die streek se groepe getel is. Baie hiervan het foto's by gehad en van hulle verskyn in hierdie uitgawe van Kampkummels.

HOE WERK DIE KAMP?

Lees op bladsy 3



Ina van den Berg bring haar grendeltyd in mooie Levubu deur waar sy by Frikkie-hulle "vasgekeer" is.



OORDENKING

Praat mekaar moed in

Lees: Galasiërs 6:1-10

Soos wat die tyd aanloop en ons in week 6 van die inperking is, word ek al hoe méér bewus wat ter rol liefde en sorg onder mekaar speel.

Ek beleef hoe gelowiges in whatsapp-groepe, kleingroepe en Bybelstudiegroepe mekaar moed inpraat en in geloof versterk. Is dit nie presies wat Paulus in gedagte het as hy aan die gemeente in Galasië skrywe: "Solank ons die geleentheid het, moet ons dus aan almal goed doen, veral aan ons medegelowiges" (Gal.6:10).


Die boere sal weet dat planttyd net 'n sekere tyd in die jaar is en net 'n sekere tyd lank duur. Dit word op 'n stadium te laat om te plant. Paulus sê dat, geestelik gesproke, dit nou planttyd is. So lank as wat ons die geleentheid het om goed te doen, om ons tyd en lewe deur die krag van die Heilige Gees te gebruik om te doen wat reg is, moet ons dit met albei hande aangryp! Dit sluit in om goed te doen aan almal maar veral om goed te doen aan ander gelowiges.

Ons is almal as gelowiges kinders in die huishouding van God. En om nou goed te doen in ons huishouding is 'n belegging wat 'n oes sal lewer vir hulle en vir ons beide nou en in ewigheid. Gebruik jy die geleentheid wat die

Here vir jou gegee het?

Gebed: *Drie-Enige God, Vader, Seun en Heilige Gees, ons bid tot U in besef van ons totale afhanklikheid aan u goedheid. Ons erken u krag as Skepper van die aarde, U wat alles tot in die fynste besonderhede gemaak het en dit tot vandag toe nog onderhou. Skenk ons u genade en liefde in die dag wat voorlê. Help ons om hierdie geleentheid te gebruik om die saadjies van omgee en liefde te saai, en laat dit groei en 'n groot oes lewer. Ons bid tot U om Jesus Christus ontwil. Amen.*

Dr. Jan Lion-Cachet
Klerksdorp



Streekbestuur 2019-2020

Voorsitter: André Baker

Ondervoorsitter: Wilanda Prinsloo

Sekretaris: Litia Joubert

Penningmeester: Bennie Oosthuysen

Redaksie: Wilanda Prinsloo

Senior burgers: Ina van den Berg

Bladuitleg Kampkrummels: Johann Lemmer: lemmerj@mweb.co.za

Bankbesonderhede: Sawa Kiepersol, ABSA Centurion 600 810 499

Hoe het Korona-kamp gewerk?

Elke lid kon by sy woonplek kamp opslaan om die naweek lekker te kuier en 'n naam vir 'n kamp-terrein kies. Gedagtes word vrye teuels gegee om mooi name vir terreine uit te dink. Beskrywings en foto's van wat daar gebeur word dan na die streek se *whatsapp*-groep gestuur sodat almal "saam kan kampeer" en die naweek stap vir stap meemaak.

Frieda Burger *volunteer* om as kampkommandant vir Kiepersol op te tree en vinnig-vinnig ontvang ons per *whatsapp* die kampprogram.

Die Prinsloos gaan die naweek huis by Rietfontein-dam, daar is 'n dam vir visvang en die oord het ook groen grasperke, lapa, swembad, skoon ablusiegeriewe en trampolien vir die kinders.

Die Jouberts en Hennings trek laer by *The Reeds Valley*, kompleet met 'n "Panorama"-uitsig ('n straat waar hulle woon). Die ander Jouberts wyk uit weste se kant toe en slaan kamp op by Joos Becker langs die Apiesrivier.

Dan is daar die Breitenbachdam, perfek vir 'n luilekker kamp met pragtige braaigeriewe. 'n Paar lede slaan kamp op by Sesmylspruit – en soos dit vir my klink is daar 'n sirkel genaamd *Blackwood*, waar Frieda kamp opgeslaan het en ook 'n sirkel Disa waar die Bronkhorstse die naweek deurgebring het.

Daar is ook kampe by Roodepoortberg, Montana, Twee Riviere, Elandsbaai, Cheetashoop, Boabab Nook-vakansieoord en die Tuinroete om maar 'n paar te noem.

Ina van den Berg, met die hulp van haar seun Frikkie (sy moes noodgedwonge sy woonwaleen) kampeer by Levubu – ek moet sê, met so 'n pragtige kamp terrein sou ek langer gestaan het.

Bakersclub is waar die Bakers kamp opgeslaan het en Con is genooi om saam te kamp. *Theo Valley* in Wierdapark was ook 'n gunstelingterrein. Daar was koue bier, of was dit nou water wat die trekpleister was? Laatkommers moes maar by *Billies camping site* hulle tent se toue vastrek.

Soos wat dit ook maar soms gaan, moes die Krugers kanselleer. Fanie Marx het blykbaar nagelaat om die Krugers se woonwa se ligte te herstel en hulle moes noodgedwonge tuisbly.

Gepraat van die Marx'e. Om 22:00 Vrydag ontvang ons die bevestiging dat hulle so pas kamp opgeslaan het by Nooitgedacht. Tienuur die aand? Dis seker ver en die pad moes baie besig gewees het! Met hulle aanboord was daar 15 woonwaens.

- Wilanda Prinsloo



Die Prinsloo kamp by Rietfonteindam



Marco, Eugenie, Wilanda, Ian, Quintin, Marnus, en Nadine



Breitenbach-dam is 'n lekker-lekker dam

Wilanda skryf (Sy het ook die ander inligting en foto's verskaf)

Ek weet nie van julle nie maar die *lockdown* was bietjie vinnig op ons en ons moes binne 48 uur alles gereël kry (by die werk asook persoonlik).

Rekenaars, lêers, skryfbehoeftes, papier en "servers" is deur baie mense in 'n tydelike kantoor by hulle woonhuise geïnstalleer. Diegene van ons wat gelukkig is om hulle administrasie vanuit die "comfort" van hulle eie woonhuise te bedryf is vinnig in volle swang, maar diegene, soos my wederhelf, Quintin, kan ongelukkig nie hulle werk by die huis verrig nie. "Julle ken die ou gesegde HKGK!!!"

So! Toe op Donderdag die 26ste Maart 2020 om middernag word ons in huisarres geplaas deur die regering op advies van die *WHO* om seker te maak die verspreiding van die vieslike Koronavirus (Covid-19) kan onder beheer gebring word.

Ek moet sê, die eerste en tweede week was *okay* gewees, niemand het op mekaar se tone getrap nie, niemand het mekaar skeef aangekyk nie, dit was soos om met 'n werksvakansie te wees.

Vervolg op bladsy 5



Dis mos nou lekker! Corné en Christa Thirion



Frank en Hettie Smith se heerlike disse afgesluk met goeie wyn

Hierdie eetgoed was by Sesmylspruit se Blackwood singel



Frieda Burger se kos is gereed om geëet te word ►



Die reuk van vars gebakte potbrood het Rietfontein-dam se kampeerplek gevul.
Die kok is Quintin Prinsloo ►



Die verloop van die grendelnaweekkamp

Vrydagaand is boekevat deur tannie Frieda Burger gedoen waarna daar 'n verskeidenheid van eetgoed beskikbaar was: Koffie en beskuit; sop en sjerrie; potbrood en roosterkoek, om net 'n paar te noem. Baie van die lede het gebraai – die vure het hoog gebrand en die biere was lekker koud.

Saterdagoggend was dit maar koel by sekere kampterreine. Met warm klere aan is vroeg-vroeg koffie gedrink (en gisteraand) se beskuit het goeie aftrek gekry. Daarna is braaipanne uitgehaal en mooi ontbytfoto's het die *whatsapp*-groep ingestroom. Daarna is verskillende speletjies soos *boules* (patang) gespeel. Con Arnold het met die wentrofee weggestap.

Teen die aand is daar weer vure (en biere) aange-steek, *bieste* pote en 'n lekker afvaltjie het in 'n swartpot geprut. Willie Bronkhorst het die boekevat waargeneem. Sommige terreine het bietjie reën gekry wat die kampeerders onder die lapa's ingedwing het.

Sondagoggend is daar eredienste op die TV gekyk en verskeie predikante het ons vir die week wat voorlê padkos gegee.

Baie van die lede (werkernasie) moes toe noodgedwonge oppak en terugkeer huis toe, maar die senior burgers het soos gewoonlik oorgeslaap. Party het selfs nog langer gebly.

Van wat ek kon aflei, was almal veilig huis nadat daar landwyd gekampeer is. Ek maak graag van die geleentheid gebruik om al die Kiepersollede te bedank vir die fantastiese samesyn.

Bly gesond, bly veilig en bly by die huis.

-Wilanda Prinsloo



*Ondervoorsitter
Wilanda Prins-
loo wat gereeld
oor Kiepersol-
kampe vir Kamp-
krummels skryf
asook foto's
neem. Groot
waardering en
baie dankie!*

André Baker aan die woord

Die voorsitter skryf

Goeiedag mede Sawanante

Wat 'n jaar! Ons gaan 2020 seker nog lank onthou. Ons het nog uitgesien na al die kampe hierdie jaar en meteens is ons gehok en hang 'n swaard (wolk) oor ons koppe met die naam "COVID-19". Wat 'n ondenkbare belewenis, ons mag net uit die huis gaan as ons moet gaan kos koop en dan met al die voorsorgmaatreëls. Ek dink nie enige van ons sou kon raai dat ons lewens so drasties en so vinnig sou verander nie.

Ons bestaan het as't ware tot stilstand gekom en ons prioriteite het dramaties verander.

As ek nou terugkyk oor die laaste twee-en-'n-half maande kan mens skaars glo dat die tyd so vinnig verbygaan en kan ons net ons Hemelse Vader dank

dat nie een van ons lede sover met die virus gediagnoseer is nie. Wat die toekoms inhou weet ons nie, wanneer sal ons weer kan kamp en hoe dit sal werk met die sosiale afstande is 'n groot vraag. In die agtergrond is ons steeds besig met beplanning maar daar is so baie onsekerhede wat ons in die gesig staar, watter kampterreine gaan die pandemie finansieel oorleef, en wie van ons gaan nog die middele hê om soos in die verlede te kampeer.

Dit is darem nie alles so somber nie. Uit Kiepersol altyd iets nuuts! (*ex Kiepersol semper aliquid novi* -Red.) Chris Joubert, ons nasionale penningmeester en Litia het met die blink idee gekom om 'n virtuele saamtrek te hou. Die NUB het dit ook goedgedink om dit op nasionalevlak te doen. Dit sou terselfdertyd as 'n fondsinsameling dien (die Preidente-kermis kon nie plaasvind nie) deurdat elke "woonwa" R100 kampgeld sou betaal. As ek na al die foto's van die naweek kyk het die Sawanante dit baie geniet en uit streek Kiepersol was daar 15 lede wat saam gekamp het.

Ja, so beleef ons baie dinge wat ons nader aan mekaar bring en ons geloof versterk. Ek wens elke lid van Streek Kiepersol 'n geseënde 2020 en alle voorspoed en gesondheid toe. Mag ons eendag weer saam kamp.

Beste Sawa-Kiepersolgroeete.

André Baker

15 Kiepersolwoonwaens is staan gemaak om by interessante plekke oor te staan



Dis baie waar woorde



Con Arnold braai en speel boules. Hy was uiteindelik die algehele wenner

Derick Breitenbach kuier by die dam saam met sy skoonseun WP



Piet van Biljon op wag by die beespotjie wat hy aanmekaar geslaan het. Hy en Johanna het die naweek by Billies Camping Site nr 16 kampeer



Close up van Blignaut by die kole in wording


Ontspanne naweek tydens grendeltyd, virus is vergete



Die tafel is gedek en Elma sit solank aan Nadat Willie vroeg-vroeg die boswa staan gemaak het



Dag-bestuurslid Chris en sy skoonouers Anna en Jerry is al besig om te eet ►



Voorsitter André Baker druk besig om te braai



Ria het die koekies met groot sorg gebak en versier. Dis vir Sondag se tee ►



Ria Raubenheimer in ontspanne luim by Boabab Nook-oord ►

Gregor-hulle maak gereed om te kamp

